

Lo'nbörger Dönken.

Von GUSTAV FRIEDRICH MEYER.

Hans Hildebrand.

Dar is in ganz olen Tiden mal'n Burn west, der hett Hans Hildebrand heiten, der is so'n beten tumpig un tüderig west. Hei hett'n smuck Fruch hadd, dei hett mit den Preister tauholn, un tau spinnen un tau arbeeten hett sei kein Lust hadd.

Wenn Hans Hildebrand tau er segg'n deet: "Du mußt doch spinnen!" denn seggt sei ümmer: "Ik heff je kein Haspel!"

Mal will Hans Hildebrand na'n Hooln un Holt hau'n, un do seggt her tau sin Fruch: "Ik bring Holt mit tau'n Haspel, un denn will ik di'n Haspel maken."

Do löppt dei Fruch na'n Hooln un verstickt sik dar, un as Hans Hildebrand anfangt tau hau'n. do röpt sei ümmertau: "Dei Haspelholt haugt, ward ophängt! Dei Haspelholt haugt, ward ophängt!"

Do haugt Hans Hildebrand kein Holt tau'n Haspel, un as hei werrer tau Hus kümmmt, do seggt sin Fruch tau em: "Na", seggt sei, "Hans, du bringst je kein Holt mit?"

"Ne", seggt hei, "dar füng ein an tau raupen: Dei Haspelholt haugt, ward ophängt! Ik will mi doch nich ophangen laten, denn schast du leiwer nich mihr spinnen."

Na, dit hett dei Fruch je gefulln, un den annern Dag löppt sei werrer tau Holt, un as Hans Hildebrand anfangt tau hau'n, do röppt sei: "Hans Hildebrand levt nich lang! Wenn hei awer sin swart Kauh slacht, denn levt hei noch lang!"

"Düwel", denkt Hans Hildebrand, "dit hett wat tau bedüden". un hei geht gieks werrer tau Hus un vertellt sin Fruch dat, dei is al werrer trüch west.

"Denn moet wi de swart Kauh wul slachen?" seggt sei.

"Ja", seggt Hans Hildebrand, "Murrer, dat lat uns man gieks daun".

Un sei slacht dei Kauh. "Du, Murrer", seggt hei, "du hest je al so lang en niegen Mantel heeb'n wullt. Wat meinst du, wenn du di dat Kauhfell ümhängen deest, is dat nich en feinen Mantel? Dar kannst du annern Sünndag gieks mit tau Kirch gahn".

"Ja", seggt dei Fruch, "dat is ok wahr, dat will ik ok". Dar löppt hei mit an, denkt sei, hei hett mi dat je vörsnackt.

An den annern Sünndag, dei Lür sitt al all in dei Kirch, do kümmmt dei Fruch mit dat Kauhfell üm na dei Dör rin. Dei beeden Hörn heebt dar noch an seten, an dat Fell, un en beten düster is dat je west in dei Kirch. Do meint dei Lür, dat is dei Düwel, un sei ward bang un lopt alltausamen ut dei Kirch rut.

Do schickt dei Preister hen na Hans Hildebrand, hei schall mal hen na em kamen, un denn seggt hei tau em, wat hei von grot Sünn dan hett, dat hei sin Fruch so wat angeben hett. "Dei Sünn is so grot", seggt hei, "dei kann ik die garnich vergeben. Du mußt int römsche Land reisen, na den heiligen Varrer Papst, dat dei di dei Sünn vergiff". Hei hett Hans Hildebrand je girn los wesen wullt, dei is em je ümmer in'n Wegen west.

Hans Hildebrand geht je tau Hus un vertellt sin Fruch dat. "Ja", seggt sei, "wenn du dat mußt, denn mußt du dat", un sei packt em Brot un Wust in. dat hei doch wat tau leben hett ünnerwegens.

Hans Hildebrand reist ok af, un sin Fruch schickt hen na den Preister, hei schall tau Abend beten röwer kamen, Hans Hildebrand is weg, un dei Kauhbraden is trech.

As Hans Hildebrand ünnerwegens is, dröppt hei den Brotträger, dei is ümmer bi em tau Nacht bleben, dei fragt em: "Na, Hans Hildebrand", seggt hei, "wo wullt du denn op af?"

"Ik will in't römsche Land reisen, na den heiligen Varrer Papst".

"Wokein hett di dat doch vörsnackt?"

"Dat hett dei Preister dan".

1929/3 - 111

1929/3 - 112

"Minsch", seggt bei Brotmann, "du büst je ni klauk, sei heebt di je wat vörsnackt. Dei Preister höllt je mit diu Fruch tau, sei wüllt di je blots los wesen. Komm du man werrer mit tau Hus, denn schast du wat beleben".

Dei beeden gaht je werrer trüch, un as sei dicht vor dat Dörp sünd, "so", seggt dei Brotmann, "nu geehst du in min Kiep sitten, un ik deck di tau un dräg di tau Hus. Un wenn ik rin kam na dei Stuv, denn sett ik dei Kiep an dei Wand hen. Du kümmst awer nich eihir herut, bet ik di raupen do".

Hans Hildebrand stiggt ok na dei Kiep rin, un dei Brotträger klappt den Deckel tau un geeht mit em na sin Hus.

As hei dar ankümmt, is dei Preister al dar, un dei Brotmann stellt sin Kiep an dei Wand hen. "Na", seggt hei. "ik kann hier wul werrer tau Nacht blieben?"

Do künnt dei beeden je nich anners, sei nödigt em mit ran an den Disch, dar hett tau eten un tau drinken op stahn, un sei langt all drei düchdig tau. Tauletzt ward sei dar lustig bi, un do meint dei Preister: "Nu lat uns mal einen singen!" un hei fangt ok gliets an:

"Einen Bauern Hab' ich ausgesandt,
ja ausgesandt,
zum Vater Papst ins römsche Land!"

Un dei Fruch singt wieder:

"Zwei Brot hab' ich ihm mitgegeben,
ja mitgegeben,
daß er erhält sein junges Leben!"

"So kann ik ok", seggt dei Brotmann un stimmt an:

"Büst du dat nich, Hans Hildebrand,
Hans Hildebrand,
sittst in mien Kiep dar an dei Wand?"

Do fangt Hans Hildebrand ok an tau singen un kümmt ut dei Kiep rut:

"Nu kann ik ok nich länger swiegen,

ja, länger swiegen,
nu mutt ik ut dei Kiep rut stiegen!"

As dei Preister dat süht, do neeht hei ut, do makt hei, dat hei wegkümmmt, un
werrerkamen is hei ok nich.

(Erzählt von Jochen Siemer, Gr. Boden, geb. **1839**).

Heimatbund und Geschichtsverein Herzogtum Lauenburg e. V.
© 2018. www.hghl.info

*